

DR. O. HALLESBY

¿IMAYNAPI CREEYTA ATIYMAN?

Ajinata tapukujkunapaj kayqa kashan

SIEMBRA

Publicado por:
© 2014 Editorial Siembra
1ra. Edición en quechua

Título original:
Si sólo podría creer.
©Dr. O. Hallesby.

Traducción al quechua, revisión y corrección:
Mario Condo Ch.

Dibujos:
J. Ariel Condo Villarroel.

Editores: Centro Lutero de Educación Teológica (CLET), dependiente de la Iglesia Cristiana Evangélica Luterana (ICEL).

Editorial Siembra - Bolivia, es la Casa Editorial de la Iglesia Cristiana Evangélica Luterana ICEL, que confiesa a Jesucristo como Señor y Salvador.

Prohibida la reproducción total o parcial sin la autorización del editor.

Informaciones en:
Centro Lutero de Educación Teológica (CLET)
Zona Alto Tucsupaya. Barrio "Los Pinos"
Teléfono: 6455069 Celular: 67602683
Correo electrónico: lgap_41@hotmail.com
Casilla 288
Sucre - Bolivia



Presentación

Lo central en la vida espiritual del cristiano es la fe en Jesucristo, de la fe depende todo, pero... ¿cómo lograr creer?, el asunto es sencillo pero profundo. En esta pequeña obrita el Dr. O. Hallesby explica que tener fe no es tan complicado como pensamos, además el autor en este su trabajo, da palabras de aliento a aquellos jóvenes y adultos que son nuevos creyentes y que están experimentando las luchas que todos hemos tenido cuando empezamos a caminar con Cristo.

Nuevamente debemos agradecer a Ingar Gangas y a la Misión Luterana Sueca por su apoyo que hace posible la traducción e impresión de esta obrita al idioma quechua. Esperamos querido lector que estas páginas te ayuden a alcanzar la paz que el señor Jesucristo desea darte.

Ptr. Gonzalo Ascarrunz Paredes
Director CLET (ICEL)
Sucre, Bolivia

Qallarinpaj

Ashka kutita, ashkhas niwarqanku uj yuyaychayta, manachayrí uj yanapata qhelqanayta astawampis mosoj creejkunapaj jina.

Tawa chunka watasña noqa creyente kasqay chaypis, sumajta yuyakushani chay chhika wataspi imaymana llakiykuna, iskayrayaykuna noqaman chayamuwasqankuta. Chaymantapacha mosoj creyenteswan parlasqaypi rikuni paykunapis noqa jinallataj, llakiykunawan, iskayrayaywan ima tinkukusqankuta.

Chayrayku kunanqa kay ujchhika yuyaychaykunata qhelqani, sonqochayta munaspa tukuy pikunachus kusiyan uyarispa chimpaykorqanku jatun khuyakoj Diosninchejman, chantapis juchasninkuta reparakuspa Jesucristo Salvadorninkuman chimpakunku, paykunapaj.

O. Hallesby

I ¿IMATAJ KASHAN CREEYRÍ?

¿Imaynapi creeyta atiyman? Ashkhas ajinata tapukunku. Jinaqa uyariy Diospa Palabrankay jinata nishan: “*Juchasninchejtachus Diosman willakunchej chayrí, juchasninchejta pampachanqa*”, nispa (1 Juan 1:9). Chaywampis kaypeqa mana creeymantapunichu parlarishan; chaywampis Diospa Palabranpiqa kay ñawirisqanchej mayta sut'inchawanchej imachus creey kasqanmanta.

Chay ñawirisqanchejpi niwanchej juchasninchej pampachasqa kasqanta, chantapis nillawanchejtaj imatachus ruwananchejta chay juchasninchej pampachasqa kanampaj.

Qhelqasqa kashan: “*Juchasninchejtachus Diosman willakunchej chayrí*” chaylla kashan, mana imatawampis ruwanachu, ¿Icharí? ¿Manachu chayqa fácil kashan?

Kunan qanqa nishankichari: Chantá, ¿Imataj kashan chay creeyri? ¿Mana creespallaqa pipis atinmanchu salvasqa kayta? nispa. Mana. Chayqa mana ajinachu kashan, “*Mana creespaqa, mana atinchejchu Diospa ñaupaqempi allimpaj qhawasqa kayta*” (Hebreos 11:6). Ajinamanta, chay ñaupaj ñawirisqanchejpi manapis sut'ita ninchu chay creeymanta chaypis, creeymantaqa parlarishanpuni. ¿Imaynapi yachasanman chay creeymanta parlasqanta?

Kayjinamanta parlarishan: Diospa nisqanmanjinaqa, ujlata ruwana tiyan juchasninchej pampachasqas kanankupaj, chayqa kashan “*juchasninchejta Diosman willakuy*”. Chantapis yachanchej ni pipis salvasqa kayta atinmanchu mana creespaqa. Creeyqa Diosman jucha willakuypi kanan tiyan. Creeyqa juchasninchejta Diosman willakuypi kashan.



Kunanqa aswan sut'íña kashan chay creymantaqa: Juchata Jesús Salvadorninchejman willakuyqa kashan creey. Pichus Salvadornimpi creen chayqa, Payman chimpaykun, tukuy juchasnintataj willakun, ajinamantataj rikukun creesqanqa salvasqa kanampaj.

Ichus qanqa, ni jayk'ay cheqamanta creenatajina creeyta atirqankichu, qanpaj kashan kay tapuriy ¿Juchasniykita Diosman willakorqankiñachu?

Ichus kutichiykiyqiqa kashan: *“Arí, unayña juchayta Diosman willakorqani, chantapis ashkha kutista chayta ruwani”* nispa.

¡Ajina kajtinqa walej kashan! Kunanqa watijmanta ñawiriy chay qallariypi ñawirisqa kajta (1Jn 1:9), chaypi sut'ita nisunki salvasqañapuni kasqaykita, Diospa wawanpunitaj kasqaykita.

Sut'ita nin, qanpa juchaykiqa pampachasqaña kasqanta, chaywampis ichus manaraj kusikuyqa sonqoykipiqa kanchu, nitaj sonqo tiyaykuypis, wakin kutisqa iskayrayayman urmashankiraj. Ichus qanqa kaypi, umaykipi pantasqata jap'erqanki imachus creey kasqantaqa.

Ichus qanqa yuyayniykiman jinalla nerqanki: “salvasqa kasqaypi creeni, Diospa wawan kasqaypi creeni” nispa. Chaywampis Diospa Palabranqa mana ajinatachu yachachin. Aswampis sut’ita nin Jesucristollapi creenaykita.

Ichus qanqa yuyarqanki salvasqa kayqa qanpi, ukhuykipi ruwasqa kasqanta, ajinata yuyaspataj munarqanki kuisqa kayta, sonqo tiyakuy kapusunanta, chantapis manaña iskayrayanaykita.

¡Mana ajinachu!, qonqasqanki juchaj pampachayninqa mana qanpichu, nitaj ukhuykipichu ruwasqa kasqanta, mana chayqa janaj pachapi. Chaymanta yachanapajqa, rikuchisqayki imatachus nin Biblia janaj pachapi jucha pampachasqa kasqanmanta.

Kay pachapi, uj runa sonqonpi juchasapa kasqanta reparakujtin, salvacionta mask’ayta qallarijtinqa, mana jatunpajchu qhawasqa kashan, janaj pachapirí chay runaqa may jatumpaj qhawasqa kashan (Lucas. 15:7,10; Hebreos 12:1).

Janaj pachamantaqa, qhawamushasurqanku chay puñuymanta jina rijch’arisqaykimantapacha. Qhawamushasurqanku, kutirikuspa puririsqaykita chay sumaj k’anchayman. Chay risqaykipiqa, mana allinchu risorqa. Juchallaykita yapakunmanpis jinaqhawarqanki. Arí, ajinapiqa jucha junt’a qhawakurqanki. Imata ruwashajtiykipis, juchaqa chaypi kasharqa astawanqa miraykuspa. Mana imata ruwajtiykipis chaypis juchallapuni qanpajqa karqa. Ajinapiqa, Diosman mana kutirikuspa, mana atiyniyoj, iskay sonqotaj Diospa k’anchaynin ñaupaqempi kasharqanki. Chay tukuy imaspi kashaspataj ichus yuyarqanki, kausayniykiqa mana allimpaj kananta, nitaj waj kausayta tarinaykita.

Ajinapi kashaspa ¿Imatá ruwarqankirí?

Ruwarqankichá imatachus cheqan sonqoyoj runa ruwanman may llakiypi kashaspa ajinata. Tukuy atisqaykitachá qhaparerqanki. Ichapis apóstol Pedro jina qhaparerqanki: *¡Señor salvaway, chinkaykushaniña!* Nispa. (Mateo 14:30).



Ajinata qhapharisqaykikamaqa ñimataj karqa? Qanman jamorqa Jesús Salvadorniyki. Arí, Pay kikin qallariymantapacha mask'ashasorqa. Paytaj tukuy munakuywan clavoswan jusk'urasqas makisninwan ojllaykusorqa, yawarninwantaj juchaykimanta liphuchasorqa.

Chantataj, janaj pachapi kaj libromanta, maypichus tukuy juchasniyki qhelqasqas kasharqanku, jatunkunas, juch'uykunaspis. Chay tukuy juchaykita yawarninwan pampacharqa, ajinapitaj tukuy manuykiykit chinkarichirqa.

¡Tukuy manuykiykimanta kacharichisqa karqanki!

Chaywampis astawanraj ruwarqa, tukuy juchaykita mama gochamanpis wijch'uykunman jina karqa, chayqa niyta munan, tukuy juchaykita qonqayman churasqanta, ajinapitaj manaña ni jayk'ay yuyarinanta, nitaj ni jayk'aypis watijmanta yuyarichisonqachu chay juchaykimantaqa.

Ajina ruwaspataj Dios kikin chay Kausay Libronpi sutykita qhelqaykurqa. Kunanqa Diospa wawan kanki wiñaynintimpaj. Diosqa ajinatapuni nin, kaytataj ni jayk'aj ni pipis chinkarichiyta atinqachu ni kay jallp'api, nitaj infiernopis.

Qanpa yuyasqaykiqa, sientesqaykiqa mana ni imapi yanapasonqachu ni uj chhikallatapis. Qanqa Diospa wawanpuniña kanki, manataj importanchu kayta sientesqaykipis chayri mana sientesqaykipis.

Salvasqa kasqaykiqa, mana yuyasqaykimantachu nitaj sientellasqaykimantachu kashan, manachayqa Diospa wiñaypa Palabranpi nisqanrayku, chaytaj kashan: Jesuspa ñak'ariynimpi wañuynimpi ima juchaykiqa pampachasqa karqa.

¡Qhawariy Jesusta, *Pay kashan Diospa Corderon, runaspa juchanta apaspa pichajqa!*



Israelitas ch'in pampapi purishajtinku, venenoyoj phiña katariswan khanirasqas karqanku, chaypachataj paykunaqa uj imallata ruwananku karqa: qhawananku karqa bronce manta ruwasqa katarita, ajinamanta sanoyanankupaj (Numeros 21:4-9). Chay runasqa mana chimpaykunankurajchu karqa llankhaykunankupajqa. Nitaj allinta entiendenankuchu karqa imaynachus chay milagro kasqanta. ¡Qhawarinallanku karqa!

Qan llakisqachu kakushanki, manaña juchapi kausayta munaspa, nillataj juchaykimanta kacharichikuyta atispa, ajina kaspasqa, ¡Qhawariy! ¡Qhawariy Diospa Corderonta! ¡Qhawariy cruzpi chakatasqa salvadorniyki ñak'arishajta, khisqa pilluwan pilluchisqata! ¡Diospa



Palabranpi ñawiriy Jesús salvadorniykimanta, Paypi yuyayniykita churay, Payta yupaychay!

Manataj saqeychu chay mana allin yuyaykunas umaykita muyuchispa iskayrayachisunantaqa, chaykunaqa Jesucristota mana taripajta nitaj jatun khuyakuyninta jap'ikujta saqesonkuchu, ¡Jesucristo Diospa Corderollanta qhawakuy!

Chay israelitas, phiña katari venenoyoj khanisqas kajkunamanta, chay bronce manta katarita qhawajkunaqa mana wañurqankuchu, aswampis sanoyaporqanku. Ajinallatataj, ni uj juchasapapis wañuyman rinqachu sichus Diospa Corderonta qhawaringa chayqa. Qanpis ñawisniyki waqay junt'a juchaykirayku qhawariy cruzta.

Tukuy kausayniypa salvasqa kayninga, Jesucristo Diospa Corderonta qhawakusqayarkulla.

Jesucristota qhawarijtinchej cruzpi mayta ñak'arisqanta juchasninchejrayku, chaypi yachanchej juchaqa may millay kasqanta, chantapis jatun phutiya apamusqanta. Creeyninchejqqa mayta kallpachakun nitaj manchachikunchu Jesucristota qhawarijtinchej, Paytaj wañurqa enemigosnimpa makisnimpi, juchaykita pampachanampaj.



II MOSOJ CREYENTEJLLAKIYKUNASNIN

Jesucristopi creekuyqa, rijch'ariypis kanman ajina kashan, chay qallariypiqa mana imapis facilchu. Mosoj creyentepajqa tukuy imaqa mosoj, mana rejsisqataj. Mana yachanchu imapichus suyakuyta nitaj imatapis ruwayta atinchu. Ichus wakin kutisqa ima suyasqampis mana junt'akunchu. Aswampis kausayninman jamunku iskayrayay, q'enaqakuy, waqay ima. Kayta qhawaspataj mana yachanchu imatachus, chayri maymanchus riytaqa.

Ajina kajtinga, chay mosoj creyenteqa kashan uj juch'uy sacha mana allin saphisniyoj jina, manataj allin thuri sayasqarajchu, manataj sumaj kallpayojchu. Imallapis atinman urmachiya.

Ajinapiqa, yuyasqanman, sientesqanman jinalla kausayta munan. Urmasqasnin, pantasqasnin imaqa mayta llakichin. Sonqonpitaj yuyan ima juchallikuynimpis mana perdonniyoj kasqanta. Mayta t'ukurispataj yuyan manaña atikusqanta kutiripa perdonta mañakuytaqa, Salvadornin contrampi juchallikusqanraykuqa.

Wakin kutispitaj, mosoj creyenteqa mana ni imatapis sonqompis sienteyta atinchu, chayraykutaj llakikun. Ichus yuyan tukuy imaqa qhasillapaj kasqanta, Diostaj manaña paywanchu kasqanta. Ajinapiqa yuyallantaj Diosqa mana dakusqanta pichus salvacionninta mana jatumpaj qhawajwan.



Chay tukuy imawan umapi kaspaga pillapis yuyanman Jesuspi creeyqa, chantapis Jesuspa salvaynenqa mana chheqachu kasqanta, aswampis uj mosqoy jinalla kasqanta, uj k'achitu mosqoylla. Manataj kay pachapi kausanapaj jinachu kasqanta.

¿Mosoj creyentes jina qallariypi kausayqa, uj mosqoy jinallachu kanman karqa?

Qallariypiqa mosoj creyenteqa yuyan ajina mosqoyjina kasqanta, tukuy imataj Diospa ruwaynin kasqanta. Chay mosqoymanta jina rijch'arispataj, yuyayninman kutirispataj nin: chay tukuy imasqa ch'aukiyaylla kasqankuta, pay kkillan ch'aukiyakusqanta.

Chaypitaj pay kikin may llakiywan nin: *“kayqa manasina Diosman cheqamanta kutirikuychu kasqa, ajina kajtinqa imaynatá cheqamanta Diosman kutirikuyman wawampuni kaynypaj, manasina noqapi kallpayojchu kani”* nispá.

Munasqa kausaqe, ama pawichikuychu chay jina yuyaykuna jamusojtin, manataj ni imata sonqoykipi sientejtiyki. Kausayniypi noqapis wakin kutis ajinata yuyarqani, nitaj imata sonqoypi sienterqanichu.

Chaywampis qanqa amapuni yuyankichu kausayniykimanta Dios t'aqakusqanta. Qanqa Jesucristo raykulla Diospa wawanqa kanki. Chayqa niyta munan, qanpeqa ni ima allin imaspis kanchu Diospa wawan kanaykipaj jinaqa. Jesucristopi creespalla qanqa Dioswan kuska kausakushanki, kusişqapis llakisqapis. Ajina kanqa, sichus qan mana qhesachankichu, iskay sonqo runajina Espiritu Santoj yachachisusqanta. Dioswan kausayniykeqa mana imata sientesqayki raykuchu kashan, chayrayku ¡Dios Tata jatunchasqapuni kachun!

Kaykama rikunchej Dioswan kausayqa mana yuyasqanchej, sientesqanchejpichu sayasqa kashan, mana chayqa Diospa ruwaynimpí, Jesucristoj ñak'ariynimpí wañuynimpí ima. Chaywampis Dioswan kausakuypiqa mana kusikuyllachu kashan. Kallantaj llakiykuna (preocupaciones), nanay, manchariykuna. Kaykunatapis Diospa Espiritu Santon noqanchejpi rikhurichin. Payqa cheqa kay Espiritu, Paytaj juchaykimanta reparachisunqa. Chay tukuy juchaykita reparachisojtenqa, ¿Imaynatataj mana llakikuwajchu, nitaj nanachikuwajchu, nitaj manchachikuwajchuri?

Chay llakiy, nanachikuy, manchachikuy imaqa kashanku jatun kusikuyta jap'ikunaykipaj. Ajinata nin apóstol Pablo: *“Diospa munasqanman jina llakikoyqa juchamanta Diosman kutirikuyman pusan salvasqa kanapaj.”* (2Corintios 7:10). Kayqa niyta munan, chay nanaykunanejta Diosqa qanpi rikhurichin chay Diosman kutirikuy munayniykita. Chay nanaykunanejta, llakiykunanejta Dios kikin qanta pusasunki sapa p'unchay songochasuspa, sinch'i thuritataj sayachisonqa.

Chay nanaykunapi, manchariykunapi kashaspaqa ama iskayrayaychu, amataj yuyaychu qampi mana allinchi kashasqanta, nillataj yuyanaykichu tiyan qanmanta Dios saqerpayasuspa karunchakusqanta.

Munasqa wauqe, ama chay pantasqa yuyaykunawanqa atipachikunaykichu tiyan, chay pantasqa yuyaykunapiqa ama confianaykichu tiyan, chay pantasqa yuyaykunaqa ch'aukiyaykullawanchej. Aswampis Diospa Palabrallampi confiakuy, chayllapi tarinki imatachus Dios nin qanmanta, ajinatataj nin: *“noqaman jamojtarí, manapuni qhesachasajchu”* (Juan 6:37). Señorninchej Jesús nerqa Diospa munakuyninqa may jatunpuni kasqanta. Watijmanta ñawirina Jesuspa yachachisqanta chay chinkasqa ovejamanta parlaspa, chantapis chay chinkaj waynamanta parlaspa ima (Lucas 15:1-31).



Ichapis, chaykunata uyarispaqa qan tapukunki: ¿Dios mayta munakuwan chayqa, imajtinta mayta mancharikuni? Nispa.

Kayta yachanayki tiyan, chay manchachikuyniykipis rikuchisunki Dios munakusqanta. Chay manchachikuytapis Diospa Espiritu Santon sonqoykipi churan. Chay manchachikuyniykiqa kashan juchallikusqayki rayku. Kay manchachikuyqa sumaj kashan, Dios kikin qanpi kashan. Ichus mosoj creyente kaspaga mana allinta entiendenkichu imajtinchus chay nanaykunas, llakiykunas, manchariykunas ima kasqankuta. Creyente jina wiñajtiykiqa astawan Diosmanta yacharikuspaqa, chay tukuymanta Payllaman graciasta qonki.

Chay manchachikuy jamusojtinga manallataj pantasqata yuyanaykichu tiyan. Amataj yuyanaykuchu tiyan Diosman kutirikusqaykiqa mana cheqachu kasqanta, manachayqa chay manchachikuyniykeqa aswampis rikuchisunki cheqamanta Diosman kutirikusqaykita, Diospa wawanpuni kasqaykita, chayraykutaj manchachikunki Dios Tataykij contrampi juchallikuyta. Uyariy imatachus nisqanta apóstol Pablo: *“chayrayku kunanqa Diosta manchachikuspa astawan kallpakullaychejpuni, mosoj kausayniykichejpi allin kayniykichej junt’asqa kanampaj”* (Filipenses 2:12).

**Mosoj kausayniyoj
runaqa Diosmanta
mañakun**



Efesios 6:18

**Mosoj kausayniyoj
runaqa: Iglesiaman rin**




Hebreos 10:25

**Mosoj kausayniyoj runaqa:
Diospa Palabranta ñawirin**



2 Timoteo 3:15-16




**Mosoj
kausayniyoj
runaqa:
Dios Tatanta
yupaychan**

Efesios 5:19

Chay manchachikuyniykeqa may sumaj kashan salvasqa kausayniykepeqa. Ajina kaspataj chay manchachikuyniykeqa iskay imasta ruwan kausayniykepeqa: Yanapasunki juchamanta kacharichisqa kayta, juchata reparachisuyta, chayta ruwaspataj, apasunki Jesucristo salvadorniykiman, Paypi sonqochayta tarinaykipaj. Chay manchachikuyniykeqa salvadorniykiman apasunan tiyan, mana Paywanqa, mana ni imatapis ruwayta atiwajchu, nitaj kausayniyoj kayta atiwajchu.

Mosoj creyentej kausaynimpíqa kallanta waj imas llakiykunata apamojkuna, chaykunataj kashanku ñaupaj kausaynimpí juchas. Mosoj creyentej kausaynimpíqa chay juchas rikhurinku tantacionespi, chatapis juchapi urmaykunapi ima. Ajinapi rikukospaqa ichus yuyan chay Diosman kutirikusqanqa runaj yuyaynillan kasqanta, ajinapiqa watijmanta jucha kausayman kutiriyta munan.

Munasqa wauqe,
 kunanqa uyariy
 kayta: Diosman
 kutirikusqaykiwanqa
 ama yuyaychu manaña
 ujtawan juchaman
 urmanaykitaqa. Arí,
 chaywampis yachanki
 chay ñaupaj juchapi
 k a u s a y n i y k e q a
 Jesucristowan cruzpi
 chakatasqaña karqa
 Diosman kutirikorqanki
 chay kikimpi.



**Pay kikin
 kausayninta
 jucharayku
 uywa
 wañuchisqa
 jaywanata jina
 jaywaykukorqa**

Isaías 53:10

Ajinapi qanqa Dioswan uj yuyayllapi churakorqanki, juchasapa kaspataj qan wañunayki karqa. Chaywampis yachanchej cruzpi ñak'arisa wañuyqa mana chay ratopachachu. Apóstol Pablo nin chay sajra aychanchejqa, juchaman urmachej aychanchejqa kausashasqantaraj cruzpi chakatasqa kaspapis. Arí, tukuy kay pachapi kausayniykipeqa, sajra aychaykeqa kausallanqapuni. Kaymanta parlaspa Galatas 5:17 ni: *“Aychaj munayninqa Espiritoj contrampi; Espiritupis aychaj munaynimpá contrallampitaj”*, chantapis 1 Juan 1:8 nillantaj: *“Sichus mana juchayoj kasqanchejta ninchej chayqa, noqallanchejta ch'aukiyakunchej, cheqa kajtaj mana noqanchejpichu kashan”* nispa.

Chay sajra aychaj munayninqa sapa runapi kashan, mosoj creyentepipis kashallantaj. Runa Diosman kutirikun chaypis, chay sayra aychaj munayninqa kallanqapuni. Chanta ¿Imaynataj chay sajra aychanchej kashanrí? *“Chayrayku aychaj yuyayninta kasojqqa Diospa contrampi kashan”* (Romanos 8:7).

Chay sajra aychaj munaynin Diospa ñaupaqempiqa mana kayta atinchu. Chayrayku sapa kuti chay sajra aychaj munaynin Diospa ñaupaqempi kashaspaqa wañunampaj jina rikukun. Chayraykutaj mana munanchu Diosmanta mañakunanchejta, nitaj munanchu Diospa Palabranta ñawirinanchejta.

Sajra aychaqa juchallikuyllamanpuni apayta munawanchej, juchallatapuni ruwayta munarin, chayraykutaj mosoj kausaypa contrampi kashan, mosoj kausaytataj chinkarichiya munan.

Ajina kashan kausayniyki munasqa wauqe, chayrayku wakin kutisqa Diosmanta mana mañakuyllatapis munankichu, nitaj Palabrantapis ñawiriya munankichu, chayri juchaman urmanaykipaj jina kanki. Chaykunaqa mana pantay yuyaykunata umaykiman apamuchunchu, nitaj q'enaqaychu nitaj iskayrayaychu. Manataj juyaychu Diosman kutirikusqaykiqa mana cheqachu kasqantaqa. Chay sajra aychaj munayninqa mana qanllatachu ajinata llakichisunki, manachayqa Diospa tukuy wawasninta.

Chay jina llakiypi kashajtiykiqa, chay sajra aychaj munaynin juchaman apasuyta munashajtin Jesucristo salvadorniykillaman qayllaykukuy,

kallpachasqa chantapis sonqochasqa kayta munaspaqa. Chay sajra aychaykij munayninmantapis Payqa pagarqaña.

Yachanki, chay sajra aychaykej munayninqa juchaman urmachiyta munasunki yuyayniyki, munayninkipi, nisqasniyki chatapis ruwayniyki. Ajina kaspaqa tukuy sonqoykita churay kay Diospa Palabran nisqampi: *“Chayrayku mana manchachikuspa, qhasilla k’acha yanapayninta qoj Diospa ñaupaqenman qayllaykunachej khuyakuyninta, qhasilla k’acha yanapaynintawan tarinanchejpaj pisichikusqanchej tiempopi”* (Hebreos 4:16).

Chaywampis, ichus qan ninki: *“sajra aychaypa munayninqa juchaman tanqaykuwan, chatapis wakin kutisqa juchaman urmachiwampuni, chayrayku kausayniyqa mana allinchi kashan, pantayllapipuni purishani”* nispa. Mana chayllachu, ichus qan kikiykita qawakujtiyki yachanki, familiaykipeqa mana allin kausayniyok kasqaykita, parlayniyki chantapis ruwayniykipeqa manapis Diospa wawanchu kawaj jinata rikususqankuta. Chantapis yuyayniyki nillankitaj: sonqoy ukhutaqa mana rejsinkuchu, rejsinkumanchus chayrí, mana ni pi yachanchu imayna sonqowanchus Diosmanta mañakusqay, nillataj yachankuchu ima sonqowanchus Diospa Palabranta ñawirisqay, chaytaqa. Nillataj yachankuchu imaynachus kasqanta chay juchata munapayayniy, juchallikuyta moq’erisqay. Chantapis astawan millayraj kashan mana imata ruwasqay chay sajra aychaypa munayninta, chantapis juchallikuyta atipanaypaj.

Kayta uyariy q’enaqasqa wauqe, ajina qhelqasqa kashan: *“Noqanchejchus allinta qhawarikusunman sonqonchejta chayqa, mana Diosnejta jasut’isqachu kasunman”* (1Corintios 11:31). Qan kikiykichus sonqoykita allinta qhawarikushanki chayqa, qanpi kausay kashan. Sonqoykipi, kausayniykipipis juchasapa kasqaykitachus rikukunki chayqa, qanqa cheqan allimpaj kausaypi kashanki Diospa ñaupaqempíqa.

¡Munasqa wauqe, ama llauchhuyaychu! Yanapata jap’inki. Sayk’usqapis kashay sajra aychaykij munayninwan maqanakusqaykipi, ichapis yuyashanki manapuni atipayta atisqaykita. Qanqa salvasqa kanki,

Jesucristo qanta mask'asuj jamurqa, Payqa "jamurqa chinkasqa kajta mask'aj, salvajtaj" (Lucas 19:10).

Jampejtaqa onqosqaslla wajyanku



San Mateo 9:12


Ichus qan yuyanki sonqoyki llula kasqanta, nunayniykipis pisi kallpa kasqanta, chayraykutaj Salvadorniykeqa mana qanpajqa imatapis ruwasqanta. Chayjinata yuyayqa may pantay kashan. Uyariy imatachus nisqanta Jesucristo salvadorninchej: "Sano kajkunaqa jampejta mana wajyanankuchu tiyan, manachayqa onqosqas kajkunalla" (Mateo 9:12). Diospa Palabranqa astawanraj nisunki: "Sonqonchejchus imallamantapis juchachawasunman chayqa, Diosqa sonqonchejmanta kurajmin, tukuy imatataj yachan" (1Juan 3:20). "Sichus payta wasanchasunman chaypis, payqa nisqanta junt'allampuni, imaraykuchus pay kikinta mana manachakuyta atinchu" (2Timoteo 2:13).

Chaywampis ichus qan ninki: "sapa kuti juchapi urmasqaykita, chantapis sonqoykipi uj juchata mana saqeyta atisqaykita, chaypitaj k'iskita urmasqaykita, chaytaj mayta llakichisusqanta". Jina kashaspaqa ichus tapukunki: ¿watejmanta atiymanchu Diosman chimpaykuyta perdonta mañakuspa? Nispa. Ichus nillankitaj: "chay pakasqa juchayta mana saqeyta munanichu, chay juchapitaj sapa kuti juchallikuni, ajinata

kausaspaa Diosmantasina burlakushani, ajinapiqa chay perdón mañakusqaypis may jatun jucha tukuy juchaymanta". Nispa.

Ajinata yuyajtiykeqa, mayta mancharikunki, llakikunkitaj, sonqo tiyaykuypis qanpiqa mana kanchu.

Wauqey, ajinapi kashaspaa qonqashanki imatachus Jesucristo nisusqanta: *"Sano kajkunaqa jampejta mana wajyanankuchu tiyan, manachayqa onqosqas kajkunalla".*



Diosman chimpakojqa, mana juchasninta atipasqanraykuchu chimpan, nitaj kausayninta allin sumajman kutichisqanraykuchu. Chimpaykun juchanta mana atipayta atispa, pay kikinpiqa qhawakuspa mana ni ima allimpis kasqanta. Ajinapiqa chimpaykun chay juchachakusqan mayta llakichisqan rayku.

Ama manchachikuychu, Jesucristo Señorniykiqa ni jayk'ay qanmanta sayk'ukonqachu nitaj ni jayk'aj saqerpayasunqachu. Uyariy imatachus nisqanta: *"Uj warmeqa wawitanta qonqarparinmanchu? Wijsanmanta*

Ilojsej wawanta manachu munakunman? Pay qonqapunman chaypis, noqaqa ni jayk'aj qonqasqaykichu. Makiyman sutyiki qhelqasqata apaykachayki" (Isaías 49:15,16).

Diosqa chay allin ruwayta qanpi qallarirqa, Paytaj mana sayk'ukunchu may chhika pantasqaykiwampis, manachayqa Pay kikin qanpi ruwanqaraj may sumaj ruwaykunata, Jesucristo kutimunankama. Diosqa qanwanpuni kashan, Paypis mayta llakikun, sonqonta nanachikun juchapi urmajtiyki. *"Payqa sayk'usqa kajta astawan kallpachan, pisi kallpayojmampis kallpata qon"* (Isaías 40:29).

Kunanqa yachankiña imatachus ruwayta juchaman urmajtiykiqa, chay kikimpi qayllaykukuy Diosman, Jesucristoj yawarninwantaj llimphuchasonqa, ajinapiqa chay jucha ruwasqayki chantapis Diosta mana kasusqayki chay jucha imaqa pampachasqa kanqanku, ajinapitaj qan Diospa ñaupaqempiqa manapis juchallikuwajchu karqa ajina karinki.

**Noqa qanwan tuta
p'unchay kashani...**



San Mateo 28:20

III ¿IMAYNAPITAJ YACHAWAJ DIOSMAN KUTIRIKUSQAYKITARÍ?

¿Imaynapitaj yachawaj cheqamanta Diosman kutirikusqaykita? Wakin kutisqa yuyankichá Diosman kutirikuspaqa manaña ni ima jucha kananta kausayniyki. Mana ajinachu kashan. Diosman kutirikusqaykeqa mana yachakunchu juchaman mana urmasqaykipi nitaj ni imapi pantasqaykipi, manachayqa Diosman cheqamanta kutirikusqaykiqa chayri mana kutirikusqaykipis yachakunqa juchapi, pantaypi urmasqaykimanta jaqayman. Pichus tukuy sonqo juchanwan, pantayninwan ima Diosman qhayllaykun, pay kashan cheqamanta Diosman kutirikojqqa, Diospa wawantaj.

Ch'uwa sonqo runaqa mana atillanchu sonqochasqa kayta, paypi Diospa Santo Espiritun kashan rikuchispa imachus jucha kasqanta, ajinapiqa chay runa wakin kutis yuyaynimpi nin: “¿Manachus Diospa jatun khuyakuynimanta burlacushayman? ajina kaspaga creeyniyqa wañusqa jinalla, qhasilla kanman” nispa.

Chay may rejsisqa pastor Pontoppidan sutiyoj, (payqa Dinamarca suyumanta), ajinata nin: “*chay wañusqa creeyqa mana imapischu, ajinapiqa Diosman mana kutirikuj runaqa Diospa khuyakuynillanta munan, manataj cheqamanta Diosman kutirikuyta munanchu*” nispa. Kayqa niyta munan chay wañusqa creeypi runaqa imaymanamantapis, imata ruwaspapis Diospa khuyakuynillanta tariyta munan, manataj chay Diospa khuyakuynin urapi kausayta munanchu, nitaj Diospa wawan jina kausakuyta munanchu.

**¡Iglesiaman rini,
chaywampis fiestitaytaqa
mana saqeymanchu!**



**¿Imayná kashan
sonqoyki?
2 Corintios 13:5**

Allin kashan qan kikiyki qhawarikunayki imaynachus kashan chay creeyniyki. *“Qankuna kikiykichej qhawarikuychej, yachanaykichejpa creeypi sinch’itachus sayashankichej, chayrí manachus chayta.”* (2Corintios 13:5). Ajinatachus sapakuti noqanchej kikin qhawarikusunman sonqonchejta, kausayninchejta imaqa, chay creeyninchejpi sinch’ita sayarisunman. Ajinapiqa yachallasumantaj kausayniyojchus manachus kasqanchejta. Pitajchus mana creejqqa, qhepaman kutijqa mana pay kikinqa qhawarikunchu, jinallataj pichus iskay sonqolla, mana cheqamanta Diosman kutirij runapis.

Ñaqha tapuyniyki karqa: *“¿Manachus Diospa jatun khuyakuyninmanta burlacushayman?”* nispa. Kayman kutichisuyta munani Diospa Palabranwan: *“Juchasninchejtachus Diosman willakunchej chayrí, juchasninchejta pampachanqa, nisqanta junt’aj, cheqantaj kasqanrayku. Jinallataj payqa tukuy sajra kayninchejmantapis pichawasunchej”* (1Juan 1:9)

Kayta sumajta uyarinayki tiyan: Cheqamantachus Diosman juchaykimanta willakuspa chimpaykunki chayqa, Diosmantaqa mana burlacushankichu. Diosmanchus chimpaykunki willakuspa sapa p’unchay pantayniykita, juchaykimanta imaqa, Diosqa jatun khuyakuynimpi juchasniykita pampachanqa. Kay jucha pampachayqa may cheqamin kashan, ni sajra aychaj munaynimpis chinkachiyta atinqachu.

Ichus qan kikiyki qhawarikujtiyki juchallapi urmasqaykita qhawanki, chantapis sonqoyki iskayrayajlla kasqanta, ajinapi kashaspaqa Diospa Palabrallampi sumajta confiakunayki tiyan, chaypitaj sinch’ita sayakunayki tiyan, manataj imapis kuyurichisojta saqeychu. Diosman juchaykita willakuy, Pay kikintaj sut’ita nisunqa: tukuy juchayki pampachasqaña kasqanta.

**Corderoj ñaupaqempi
kasharqanku,
yuraj p'achaswan
p'achallisqas.**



Apocalipsis 7:9-14

Ichus qanqa yuyashanki sajra aychaykij munayniwan maqanakusqaykirayku, Diospa wawan kasqaykita, chayta mana atipaspataj llauchhuyanki, iskayrayanki ima creeyniykipi. Ajinataqa mana yuyanaykichu tiyan, chayqa mana ajinachu.

Qanqa Diospa wawampuni kanki, chaytaj kashan mana sajra aychaykej munayninwan maqanakusqaykiraykuchu, nitaj chayta atipasqaykiraykuchu. Chay maqanakusqayki, atipasqaykitaj mana imata ruwanankuchu tiyan Diospa wawan kasqaykiwanqa. ¿Imaynapitaj Diospa wawan kanki? Kayta nin Diospa Palabran: “*Astawampis sutimpi creejtinku, tukuy payta jap'ikojkunaman atiyta qorqa Diospa wawasnin ruwasqa kanankupaj*” (Juan 1:12). Kaytaj may kusiy kashan Diospa wawampajqa.

Cristoj wañuynimpi, Tukuy kasqayta sayachishani.

Jesusa mayta ñak'arisqampi, Kausayniyqa jatun samakuyta jap'in.

Paypi tarini wiñay kausayta, Noqallapiqa mana imachu kani.

Jesusa qowasqallanwan, Diospajqa may munasqa kani.

Dios Tatayki reparachisojtin, sapa p'unchay kausayniyki mana cheqa kausayniyoj kasqaykita, nitaj imapaj valesqaykita chayqa, ama iskayrayaychu nitaj q'enaqakuychu, manachayqa, astawanraj Jesusman qayllaykukuspa ninayki tiyan: *"Diospa wawan kani, kayqa mana noqaj allin ruwasqayraykuchu, nitaj kausayniyta ujinaman tukuchisqayraykuchu, mana chayqa Jesucristoj tukuy ruwasqanraykulla Diospa wawanqa kani"* nispa.



Wakin mosoj creyentesqa kusiyan sonqo tiyaykuywan ima junt'a kanku.

Wakinkunataj mana manchachikuspa Jesumanta waj runasman willanku.



Wakinkunapajtaj manasina sonqo tiyaykuy nitaj kusikuypis kanchu

Runas Diosman chimpaykujtinku Jesucristopi creekuspa, mana tukuychu uj rejlla kanku. Wakinkunaqa kusiyan, sonqo tiyaykuywan ima junt'a kanku, mana manchachikuspataj Jesucristomanta waj runasman willayta qallarinku. Wakinkunapajtaj manasina ni kusikuy nitaj sonqo tiyaykuy kanchu, astawanpis imaymana uma nanaykuna rikhurin, chantapis may llakiyunas rikhurinku. Tukuy ruwaykunasnimpitaj yuyanku juchalla kasqanta, chayraykutaj, ni imata ruwayta atispa phutikuyta, iskayrayayta ima qallarinku.

Ichus ajinapi qan kashanki, waj mosoj creyentespa kausayninkupi rikuspa kusiyta, sonqo tiyaykuyta, chantapis mana manchachikuspa Jesucristomanta willasqankuta ima, chaykunata qhawaspataj qan kikiyki yuyanki Diosman kutirikusqaykiqa qhasillapaj kasqanta, sonqoykipitaj pantaylla kasqanta chayraykutaj ni kusiy ni sonqo tiyaykuy kapusqanta, chantapis manchachikuylla kasqanta qanpi.

Munasqa wauqe, chay llakiyniyki, chay sajra aychaykej munayninwan maqanakuyniykiqa ama iskayrayachisuchunchu. Chay llakiyniykiqa rikuchishasunki mana pantashasqaykita. Jesús chaymanta parlaspa nerqa: Diosman chimpajkunapajqa llakiy, juchawan maqanakuyqa jamunankutapuni kasqanta. Llakisqachu kashanki chayqa, uyariy kayta: *“kusikuyniyojmin kanku llakiypi kajkuna”* Chay llakiytaj Diospa munasqanman jina kasqanraykutaj sonqoykipi Diosman kutirikuyta churan. Apostol Pablopis nin: *“Diospa munasqanman jina llakikoyqa juchamanta Diosman kutirikuymán pusan salvasqa kanapaj. Chaymantaqa mana pesachikunachu”* (2Corintios 7:10).

¡Mañana atinichu kay juchaywan...!



San Mateo 11:28

Diospa Palabranman jinaqa, allin sumaj ñampi kashanki. Diosman graciasta qonayki tiyan, chay llakiywanqa rijch'arichiyta munan chay wampu sonqoykita. Diosqa kausayta qonanpajqa ñaupajtaqa wañuchinanraj tiyan. Chay ñaupá, mauk'a kausayqa wañunampuni tiyan. Chay wañuytaj chay llakiyta apamusunki. Chayqa allinniykipajpuni kashan.

Nerqanchejña, wakin mosoj creyentesqa qallariymantapacha kusiya, chantapis sonqo tiyaykuyta tarinku. Chaywampis paykunamampis chayanqa llakiykunas chantapis sajra aychankuj munayninwam maqanakuyqa.

Paykunapis llakiyman urmanqanku. Qhawanqanku kausayninkupiqá chay kusiy sonqo tiyaykuy ima chinkapusqankuta, sonqontaj ch'usajpis kanman jina qhepakusqanta, ajinapiqa yuyallanqankutaj Dios saqerpayasqanta. Ajinapitaj Maria jina waqanqanku: *“Señorniyta apakapusqanku, manataj yachanichu maymanchus churasqankuta”* nispa (Juan 20:13).

Chaywampis, chay kusiy, sonqo tiyaykuy imaqa, watijmanta kutirin kausayninkuman. Ajinapuni kanqa llakiykuna, kusikuykuna imaqa jamunqankupuni.

Ajina llakiykuna jamojtinga wakinkunaqa, yuyanku mosoj kausay tarisqankuqa chinkapushasqanta. Manaña kusiypi kasqankuta, Diosmantaqa manaña uyariytapis munasqankuta. Chayqa mana allinchi kashan.

Qhallariypi mosoj creyentes kashaspaqa Bibliata mayta munakuj kanku, kunanqa ichus mana ni ñawiriytapis munankuchu. Diosmantapis tukuy kusiywan sapankupi mañakuj kanku, kunanqa manaña munanankupaj jinachu. Iglesiasmanpis qallariypiqa kusiywan rij kanku, Diospa Palabranta uyariyta munaspa chantapis hermanoswan qhotuchakuyta munaspa, kunanqa mana ni pitapis rikuyta, uyariyta munanchu.

**“Uj tarpoj runa llojsisqa mujuta tarpoj.
Tarpushajtintaj, wakin mujoqa... pisi
jallp’ayoj rumiraraman urmasqa”.**



San Mateo 13:1-5

Yuyarqanku chay qallariypi kusiyan juchata atipasqankuta, chaywampis mana ajinachu, pisimanta pisi, chay jucha rikhurillantaj, chay sajra aychaj munaynin pisimanta pisi atipayta qallarín. Ajinapi rikukuspaqa uj mosoj creyenteqa, qhawakun pantaypi kashasqanta, chaymanta llojsinanpajtaj mayta pay kikin kallpachakuyta munan Bibliata ñawirispa, Diosmanta mañakuspa chantapis juchanta saqeyta munaspa. Ajinapis chay kallpachakusqanqa ni imapi yanapanchu, nitaj kusiya qonchu, watij watij juchapi urman, sajra aychampa munayninwan atipachikun, ajinapitaj llakiypi rikhurin.

Ajinapi kashaspaqa, yuyanqa Diosta mana munakusqanta, nitaj juchata chejnisqanta, yuyanqataj Diosman kutirikuyninqa yanqhalla kasqanta, ni imapaj valesqanta. Diosman kutirikoypa yuyaynimpis mosojman tukusqanta, paypatataj kikillampunisina kashasqanta. Kaytaj iskayrayachin sonqonpitaj yuyan Diosman kutirikusqanqa mana cheqamantachu kasqanta, chantapis chay kusiyyqa qhasillapaj kasqanta. Ichus tapukonqa ¿Jesusqa kaytasina niyta munawarqa?: *“Pichus Diospa Palabranta uyarín, chaypachataj kusiyan jap’in, chay runaqa rumirara jallp’a jina, maymanchus muju t’akakusqa, chay”* nispa. (Mateo 13:20.21).

“Pichus Diospa Palabranta uyarin, chaypachataj kusiywan jap’in, chay runaqa rumirara jallp’a jina, maymanchus muju t’akakusqa, chay. Mana allin saphichasqa kaspá, mana unayta kayta atinchu...”



San Mateo 12:20-21

Munasqa wauqe, kayqa mana facilchu qanpajqa, chayta noqapis yachani, kausayniypiqá ajinallataj karqa. Ichus qanqa reparakunki atipasqa kasqaykita, ch’akipoj sacha jina.

Kayta allinta uyariway, chay tukuy ima kausayniykipi kasqanqa mana niytachu munan, Diosman kutirikusqaykeqa qhasillapaj kasqantaqa. Astawampis Diospa Santo Espiriton qanpi ruwayninta ruwashan, allin ñanmantaj kausayniykita apashan. Chaywampis, ajinaqa ichus mana entiendenkichu, apostol Pedropis mana entienderqachu, chayrayku Jesús nerqa payman: “*Kay ruwasqayta mana entiendenkichu, nispa*” (Juan 13:7.)


Diospa Palabranpi nin, Pay kausayta qosqanta chantapis qhechusqanta (Deuteronomio 32:39). Ajinallatataj noqanchejpis wañunanchej tiyan Diosmanta kausayta jap’iyta munaspaqa. Apostol Pablo Diosman kutirikusqanmanta willaripa nin: “*Chay kikin ley, mayqen chus kausayta qonawan karqa, chay noqapajqa wañuyta apamorqa*” (Romanos 7:10). Chay Romanos 7:9-25ta allinta ñawiriy, apostol Pablo willashan Diosman kutirikusqanmanta.

Qanpispis chay wañuy rikuchikushan. Wañuyqa may llakiyta, nanayta ima apamun. Chaywampis ama pawichikuychu, nitay yuyaychu pantaypi kashasqaykita, imajtin chus Diospa Espiritu Santon sumaj ruwayninta qanpi ruwashan. Pay juchamanta reparachin, Paytaj qanman reparachishasunki chay millay juchasapa kasqaykita. Rikuchishasunki

sut'imanta sonqoykipiqa Diosta mana munakusqaykita, astawampis qanllata mayta munakusqaykita. Kaykunata rikuchishasuspaqa juchasapa, wajcha, chinkasqa kasqaykita rikuchishasunki, chantapis rikuchisunki Salvadorniykimanta jap'ikunaykita. Juchasapa kaspapa runa wañuchipis kawaj jinaman tukorqanki, wañuyllataña suyaspa, Diospa jatun khuyakuynillantaña mañakuspa.

Ajinapiqa tapukunki: ¿Diosqa yanapawayta atinmanchu ajina millay yuyayniyoy runata? Nispa.

Arí, yanapasunqapuni. Manachus yanapasuyta atinman chayqa, manallataj juchasapasta salvayta atinmanchu.



Runaqa juchayoj, Diospa enemigontaj. Chay jina kausayninta ni imata ruwaspapis allinyachiyta atinchu

Romanos 3:23

Mana kanchu ni uj runallapis pay kikinmantaqa kausayninta allinyachejqa. Runaqa pay kikinllata munakun, juchalliyllaman qokun chatapis Diospa enemigon. Chay jina kausaynintaqa ni imata ruwaspapis allinyachiyta atinmanchu. Dioslla chay jina millay kausaytaqa allinyachiyta atin. Chayrayku saqena Pay rikuchinawanchejta juchaspi urmasqa kausayninchejta, chantapis Payllaman willakuna tukuy juchasninchejta mana pakaspa nitaj millay kausayninchejta kutikuspa. Diostaj chay tukuy juchasninchejta pampachanqa Jesucristoj noqanchej wañusqan rayku, jinaspataj mosoj runasman tukuchiwasun.

Ichus qan ninki: *“Arí, chayqa ajinapuni, chaywampis mosoj runa kasqaytaqa sonqoypi mana sientenichu nitaj kausayniypi rikunichu. Unayña kashan Diosman kutirikusqayqa, chaywampis kausayniyqa kikillampuni. ¿kayqa manachu rikuchishawan Diosqa mosoj runaman mana tukuchiwasqanta?”* nispa.

Chay nisqaykiqa mana ajinachu kashan. Qanqa, manaña ñaupaj kausayniyki juchasapa jinachu kanki. Chay ñaupaj kausayniykiqa Diosmantaqa mana uyariyllatapis munajchu kanki, aswampis tukuy juchallikusqaykitaqa kutikojkanki. Kunanqa Diospa nisqanta uyariytapuni munanki, mana jina kajtintaj manchachikunki mana uyariytaqa. Kunanqa Diosman chimpakunki juchaykita willakuspa, unayqa mana chayta ruwayta munajchu kanki, astawampis Paymanta pakakuyta munaj kanki. Ñaupaj kausayniykiqa, rumi sonqoykiqa kisisqa, mana ni imamanta dakuspa, juchanmanta mana llakikuspa kasharqa. Kunanqa mancharinki kharkatirinkitaj juchasapa kausayniykita, rumi sonqoykita qhawarispá. Kunantaj qan kikiyki qhawarikunki chiri, rumi sonqo, wañusqa kasqaykita, mana ni imata ruwayta atispataj Diosllaman chimpaykunki, Payllamanta jap'ikunki.

¡Qhawarikuy, kausayniykiqa manaña unay kausayniyki jinachu, chaymantaqa Diosman graciasta qonayki tiyan! Pay, qanpi sumaj ruwayninta ruwashan, manaraj tukuchanchu chayrayku kausayniykiqa chay mana allin imas kashanraj. Chaywampis kusikuy Dios qanpi allin imasta ruwashasqanmanta. Yuyarikuyuni kayta: Diosqa kausayta qonampajqa ñaupajtaqa wañuchinraj, sinch'ita sayarichinampajqa ñaupajtaqa urmachinraj.

Chaywampis, ichus qanqa nishankiraj: *“Diosman kutirikuj creyenteqa mana iskayrayananchu tiyan, noqaqa iskayrayani, kausayniypitaj sonqo tiyaykuy mana kanchu. ¿Manachu kay niyta munan kausayniy Dioswan mana allinpi kashasqanta?”* nispa.

Dios Tatay, qanlla
yachachiway kay
Palabraykita



Arí, uj creyente Diospa wawan kasqanmanta manaña iskayrayanchu chayqa, ¡Dios yupaychasqa kachun!

Chaywampis uyariy kayta: qanqa Diospa wawanpuniña kanki chaytaj mana, mana iskayrayasqaki raykuchu. Diospa wawan, salvasqataj kanki Jesucristopi creekuspalla. Chay mana iskayrayayqa jamun salvasqas kasqanchejrayku.

Creeyqa niyta munan, Jesucristoman tukuy juchasninchejta mana pacaspa willakuspa chimpaykuy, chay kikin ratomantapacha runaqa salvacionta jap'ikun, kusiya, llakiyta sientechumpis amapis. Diospa Palabran nin: *“Juchasninchejtachus Diosman willakunchej chayrí, juchasninchejta pampachanqa, nisqanta jut'aj, cheqataj kasqanrayku”*.


Ajina salvasqa kaspaga, tukuy jucha pampachasqa kashan, chay mana iskayrayayqa uj yapa jinalla kashan, chay mana iskayrayaytataj Diospa Espiritu Santon qanpi churanqa.

Chaywampis ichus tapukushankiraj ¿Imaynatá ruwasajri chay tukuy uyarisqaypi creenaypaj ajinapupi kasqantari? Nispa.

Kayjinamantataj kutichisqayki: Ñaupajtaqa, Diosllaman willakunayki tiyan mana creesqaykita chay tukuy nisqampi. Paypitaj tukuy sonqowan creekuyta munasqaykita. Chaypajtaj Diospa Palabranta ñawirinayki tiyan, Paymanta mañakunayki tiyan, chantapis Santa Cenata jap'ikunayki tiyan. Kaykunaqa sutikunku "Medios de Gracia". Kaykunanejtataj Diospa Santo Espiriton qanpi churanqa Diospi mana iskayrayaspa creeyta.

Qhepantataj, Diosllaman saqey mayk'ajchus chay mana iskayrayayta qosunanta. Payqa mayta munashan chay mana iskayrayayta qosuytaqa, munasqaykimanta astawanraj.

**Santa Cenapi,
jap'ikunchej juchaj
pampachayninta.**



San Mateo 26:28

IV DIOSWAN SAPAYKIPI SAPA P'UNCHAY


Kunanqa ujchhikanta parlarisuyta munani sapaykipi Dioswan sapa p'unchay karikunaykimanta. (Sapa p'unchay devocionalta ruwanaykimanta)

Iglesiapí tantakuyqa may allin kashan qanpajqa. Chaykunapi sinch'ita kallpachayta jap'ikunki, tukuy manchachikuyniykita saquespa. Wakin kutisqa sapa p'unchay kausayniykiqipa sapayki rikukunki, ajinapis, iglesiapí tantakuyman rijtiykiqa rejsisqasniykiwan tinkukuspa, tukuy sonqo takiykunata Diosman takijta uyarispa, Diospa Palabranmanta uyarikuspa, testimoniosta uyarispa, chantapis tukuy hermanoswan uj sonqolla qonqorikuspa Diosmanta mañakuspaqa, chay manchariy, chay iskayrayay imaqa chinkanku, may allintaj sientekunki. Wasiykimantaj kutipunki creeyniyki sumaj kallpachasqa, pillatapis munakunaykipaj jina, kallpachasqataj iskayrayayta, q'enaqakuyta ima atipanapaj jina, chantapis Diosta mayta serviyta munaspa.

Chaykunaqa may sumajmin kanku, Diosman graciasta qonayki tiyan chay tukuy imasta tarisqaykimanta iglesia tantakuykunapi; chaywampis allinta qhawakuy, mana saqenaykichu tiyan Dioswan sapaykipi kakuytaqa. Allinta yuyarikuy Jesuspa nisqanta: *“Qanrí Diosmanta mañakunaykipajqa, cuartoykiman yaykuy; punkuykita wisq'aykamuspataj, pakaypi Tataykimanta mañakuy”* (Mateo 6:6).

¿Imajtintaj Jesús munan punkuykita wisq'aykunaykitari? Ajinapiqa mana ni ima pantachisunampaj nitaj yuyayniykita waj imasman churanaykipaj, waj imaspi piensaspa. Chantapis wajkunaj uyariyninmanta, qhawariyninmanta ima t'aqakunaykipaj. Jesusqa munan sapa p'unchay qanwan sapallaykipi kanaykita. Kuraj Supay Satanasqa manapuni munanqachu cuartoykiman yaykuspa sapallaykipi Dioswan kakunaykitaqa, imajtinchus pay yachañña sumaj imasta, kallpachayta ima jap'isqaykita Dioswan sapaykipi kaspera, ajinapi mana atinqachu urmachisuyta. Sapa p'unchay sapallaykipi Dioswan kakuspaqa, kausayniyki kallpata, uj jark'ayta ima jap'ikunki atipanaykipay chay Supaypa juchaman urmachisuyta munayninta.

Dioswan
sapaykipi
sapa
p'unchay.




Chantapis chay Kuraj Supayqa yachañña creyentes Dioswan mana sapankupi karikuyta munajkunaqa (devocionalesta mana ruwajkunaqa) ratulla urmachinapaj jina kasqankuta. Runaj sonqonqa mana chhusajqa kayta atillanmanchu. Manachus sonqopi Dios junt'a kashanman chayqa, chay sonqomanqa kay pacha imas, juchallikuy imas junt'aykonqanku. Ajina kaspaga, chay sonqoqa Diosmantaqa manaña dakunchu, nitaj manchachikunñachu, nitaj paypi ima sajra kashajtapis reparakunqañachu, ichus reparkuspapis, Diosman chimpaykuyta allinyakuyta mask'aspaqa, mana munanqañachu. Ajinapiqa, chay kausaynin, chay sonqon, Diosmanta ch'usaj kaspaga, uj chhika, uj chhikamanta wañushan. Ajina kajtinqa, ¿Manachu Satanasqa, usqhayllata, tukuy kallpanwantaj mana saqenqachu, uj creyente sapampi Dioswan karikunanta sapa p'unchay? Arí, chaytapuni ruwanqa.

Kuraj Supayqa manchachikun, kharkatirintaj Dioswan sapanchispi kajtinchej. Chantapis chay sajra aychaj munaynimpis mancharillantaj, imajtinchus, Dioswan sapanchejpi karikuyninchejqa chay sajra aychaj

wañuynin kashan, kaymanta parlaspa Diospa Palabran nin: “*aychaj yuyayninta kasojqqa Diospa contrampi kashan*” chayrayku chay sajra aychaqa manapuni munanchu Dioswan sapanchejpi karikunanchejtaqa, astawampis chay sajra aychaqa aswanraj waj imaspi yuyachiwanchej Diospi yuyachinawanchejtaqa.

Kuraj Supayqa mancharikun, kharkatirintaj Dioswan sapanchejpi kajtinchej.



Chayrayku sapa p’unchay sapanchejpi Dioswan karikuyninchejqa (devocionalta ruwayninchejqa) mana atikuj jina, mayta maqanakuna tiyan chay sajra aychanchej munayninwan.

Diosmanta mañakunaykipaj, orakunaykipajqa (devocionalta ruwanaykipajqa) kananpuni tiyan tiempoyki. Chaypajqa mana pipis tanqasunqachu, tiempotapis ni pi qosunqachu, qan kikiyki tiempoykita wakichinayki tiyan ima ratopis Diosmanta mañakunaykipajqa, allintaj kashan sut’iyaypi devocionalta ruwanaykiqa.

Munasqa hermano, imapis kachun, imapis jamuchun chaypis, Diosmanta mañakuypuni. Manapuni ni uj p'unchayllatapis saqeychu Dioswan sapaykipi karikuytaqa, ajinamanta kallpata jap'ikunki atipanaykipaj kay pacha kausaypi imaymana mana allin kajwan, tentacioneswan ima tinkuyniykipi.

Chayrayku, tutamanta, chhapu chhaputa puñunaykimanta sayarikuspa Diospa Palabranta ñawirikuy, chantapis Paymanta mañarikuy.

Ichus qan yuyanki, sut'iyayta jatariyqa puñuywan mana sajsakuy kasqanta. Kayta niyki jastawan ñaupajta puñukapunayki tiyan! Wakin runas tutakama rijch'arisqas kayta yachanku, mana imata ruwaspa yanqalla, ajinapi puñuspaqa puñuywanqa mana sajsanqankuchu. Qanqa ñaupajta puñukapuy ajinamanta allin samarisqa puñunaykimanta sayarinaykipaj, allin tutamantataj rijch'arikunaykipaj, Diospa Palabranta ñawirinaykipaj, Diosmantaj oracionpi mañakunaykipaj ima, ajinapi kallpachakuspa atipanaykipajtaj llakiykunata, nanaykunata, tentacionesta ima. Pichus Dioswan p'unchayninta qallarejqa, kallpachasqa kanqa, kaytaj yanapanqa ñaupajllamanpuni creeyninpi rinanpaj.

Wakin runas tutakama rijch'arisqas kayta yachanku, mana imata ruwaspa, yanqalla.



Cuerponchej mana llaychuyanampaqa, manataj mana kallpayoj kanampajqa ashkhata mukhuna tiyan, ichus kinsa kutita uj p'unchayllapi. Ajinallataj Dioswan kausayninchejpipis kanan tiyan, chay rayku, sapa p'unchaypi mashk'anayki tiyan uj tiempota, paqarimpi, kuskan p'unchaypi, chantapis ch'isiyaypi Dioswan sapayki karikunaykipaj, Paypa Palabranta ñawirinaykipaj, chantapis Paymanta mañarikunaykipaj. Ajinamantataj qan kikiyki rikukunki may kallpachasqa kasqaykita cristiano kausayniyki. Ajinallamantataj mayta kallpachasonqanku chay "Medios de Gracia" nisqata japikujtiyki. Dioswan sapapi karikujtinchej, chantapis Diospa qowasqanchejta jap'ikujtinchejqa, may kallpachasqas kasun, Señorninchej Jesús nin: "...*kausayniyoj kanankupaj, aswan junt'asqa kausayniyoj kanankupajta*" (Juan 10:10). Chayraykutaj chay millay imasta ruwasqaykita saqey, Diospa wanachina jasut'iyintataj jap'ikuy. Ajinamanta qanqa yachakunki "Diosqa mana tukuy imata chajruj Dioschu kasqanta, aswampis tukuy imata allimpi, cheqantataj ruwasqanta".

Wakin mosoj creyentesqa mana yachankuchu imaynatachus Diospa Palabranta ñawiriyta. Wakinkunaqa ni ujchhikallantapis ñawiriyta munaspa Bibliankutaqa waj ladoman saqerpayanku. Ajina kajtinqa mana allinchu kanqa chay mosoj creyetepajqa. Sonqonpiqa mana allin imas junt'aykunqa, chiri sonqotaj tukonqa. Chay mosoj creyenteqa ichapis Diospa Palabanmanta willayta uyarinraj, uchu sonqon wawayan Diospa Palabranta uyarijtin. Chaywampis chaykunaqa uj ratolla pasapun, ajinapiqa mana kallpachanchu juchapi mana urmananpajqa.

Wakinkunataj sapa p'unchay Bibliata ñawirinku, ajinapis mana tukuy sonqonkuwanchu ñawirinku, manachayqa tanqasqas jinalla. Chayraykutaj yuyanku mana allin kasqanta, manataj kausayninkupi yanapasqanta, yanqhallaqaj kasqantataj.

Wakin kutisqa pantanki yuyaspa Bibliata ñawarispasqa qan kikiyki sonqoykipi mayta jap'ikunaykita, chayraykutaj llakikunki chay

ñawirisqaykita qonqarparijtiyki. Aswampis mana jinachu, Diospa Espiritu Santon sonqoykimanqa churanqa chay Diospa Palabranta. Ajinamanta Diospa Palabranqa qanpajqa kanqa uj sumaj mikhuy jina kausayniykupa. Chayrayku chay mana allin yuyaykunawanqa mana iskayrayaychu, astawampis Bibliaykita ñawiriypuni, Diosmantataj mañakuyuni.

Bibliaykita ñawirinaykipaj kashajtiykiqa, Diosmanta mañakuy Pay kikin parlasunampaj, ashkhatapis chayri pisitapis ñawirisqaykipi, ajinapi chay Bibliata ñawirisqaykiqa sumaj kallpachaj mikhuna jina kanqa kausayniykipaj. Wakin kutisqa amapis yachaychu imatachus ñawirisqaykita, jap'ikusqaykita ima, graciasta qoy Diosllaman tukuy cheqa, sut'i yachachiynimanta. Espiritu Santolla ruwanqa sumaj imasta kausayniykiyqa, amapis qanqa yachasaychu imatachus ruwasqanta qanpi.

Kunanqa uj chhikanta parlarisuyta munani chay Santa Cenamanta, Señorpa Cenamanta. Diosman kutirikunaykipaj rijch'arichisqa kasqaykimantapacha qanqa atinki Santa Cenata jap'ikuytaqa. Kikin Señorninchej Jesucristo mink'arishasunki chantataj suyasunkipuni chimpaykunaykita.

Ichus tapukunki: ¿Santa Cenata jap'ikuymanchu sonqoypi iskayrayay kashajtinrajqa? Nispa.

Arí, jap'ikuyta atinki. Tukuy pikunachus juchasninkuta mana pakaspa Diosman willkunku, paykunapaj Santa Cenaqa. Kayta sumajta uyariy: Santa Cenataqa jap'ikunaykipuni tiyan, Diospa wawanpuniña kanki, Jesusqa dueñoyki. Kayqa niyta muna kasunayki tiyan tukuy imapi. Pay nisunki: *“kayta mikhuy” “kayta ujay” “kayta ruwaychej noqamanta yuyarikuspa”* nispa. (Lucas 22:19).

Santa Cenapiqa, Diospa qhasilla khuyakuyninta jap'ikunchej. Chay t'antata mikhuypi, vinota ujaypiqa jap'ishanki Señorpa cuerponta

yawarnintawan, ajinapi Pay kikin yaykun tukuy kausayniykiman jatun imastataj ruwan qanpi, chaytataj mana pipis umankuwanqa entiendeyta atinkuchu. Chayrayku qanqa Santa Cena ruwakujtinga jap'ikuypuni, ama qhawaspallaqa qhepakuychu. Diosmantaj graciasta qoy chay Santa Cenapi sumaj imasta qosusqanmanta kallpachasuyta munaspa.

“Kayta mikhuy... kayta ujjay... kayta ruwaychej noqamanta yuyarikuspa...”



V CRISTIANO JINA KAUSAKUYNIYKEQA SAPA P'UNCHAY KANAN TIYAN

Kayta tukunapajqa, uj chhikanta parlarisun sapa p'unchay cristiano jina kausanamanta.

Kaymanta parlaspa Jesús nin: *“Ajinallataj k'anchayniykichejqa k'anchachun runaspa ñaupaqempi, paykuna allin ruwasqasniykichejta rikuspa, janaj pachapi kashaj Tataykichejta jatunchanankupaj”* (Mateo 5:16).

Munasqa wauqe, qan mosoj creyenteqa kaypi t'ukuriy, Jesús kayta ruwanaykita munan: runasman allin ruwasqaykita rikuchinayki tiyan. ¿Pikunataj kanku chay allin ruwasqasniykita rikujkunari? Chaykunaqa kanku, qanwan khuska sapa p'unchay tiyakoykuna; wasiykipi, chantapis llank'anaykipi ima. Jesusqa mana munanchu mana imapi pantaj kanaykitaqa, astawampis munan juchata atipanaykita sapa p'unchay. Sichus uj runa masiykij contrampi juchallikunki chayqa perdonninta mañakunayki tiyan. Chantapis Jesusqa munan llamp'u sonqo kanaykita, kayqa niyta munan: k'acha sonqo kay, waj runaswan allinpi kay, cheqan sonqo kay, mana wajkunamanta imantapis qanllapaj jap'ikunaykita, aswampis runa masiykita munakuywan yanapanaykita. Jesusqa munan cristiano jinaqa wasiykipi kajkunawan k'acha kanaykita.

Diosman chimpaykusqayki p'unchaymanta pachaqa, tatayki mamayki imaqa yuyarqanku k'acha kanaykita wasiykipi, chay phiñasqalla kayniykimanta k'acha sonqoman tukunaykita. ¿Qhasipajchu ajinata yuyankuman karqa? Ichus suyashankuraj Diospa munayninman jina k'acha kanaykita, tatayki mamaykiqa mayta suyashanku kaytaqa. Paykunaqa mana munankuchu domingo p'unchayllapi k'acha kanaykitaqa, nitaj iglesiallapi k'acha rikuchikunaykitaqa, manachayqa paykunaqa munashanku, sapa p'unchay, mayllapipis Diospa wawan jinapupi kausakunaykita, k'acha sonqo kanaykita.




Chantapis, Jesusqa munashan qanwan khusqa llank'ajkuna allin ruwasqasniykita rikunankuta. Chayraykutaj munan qan, tukuy ruwanaykita llank'anaykipi allinta cheqanta tukuy sonqo ruwanaykita. Pichus llak'achisojpis rikuchun chay llank'anaykipi ruwayniykeqa Señorniykipaj jinapuni ruwasqa kasqanta.

Ashkha runakuna manaraj Diospa Palabranta uyarinkuchu, nitaj Jesucristomanta uyarinkuchu. Paykunaqa creyenteswan kushanku llank'anasi, qhatupi, oficinaspi, wasipi ima, paykunaqa qanta qhawashasunku. Jesús kikin nin runasqa qhawananku kasqanta chay allin ruwasqaykita, qhawananku kasqanta creyente jinaqa mosoj runa kasqaykita.

Wauqekuna, kuanllaraj Diosman kutirikojkuna, qankunaqa llank'ankichej Diospi mana creej runapaj. Kausayniykichejta, allin ruwasqaykichejta ima qhawaspa chay mana creej runaspis Diosman chimpaykunankupaj.

Uj creyenteqa llank'an Diospi mana creej runaswan, chayrayku mosoj kausayninta rikuchinan tiyan



Allin kashan pastor kanan Diospa Palabranmanta yachachinampaj, chaywampis runas payta mana uyarejtinkurí, qhasillapaj kanman. Allin kashan misioneros kanan iglesianchej ukhupi, chawampis runas mana chaypi kajtinkuqa, qhasillataj kanman.

Chayrayku wauqekunay, qankunapaj uj jatun ruwana kashan, kaytataj ni pi misionerospis ruwayta atinmanchu. Ichus qankunapis mana ruwayta atinkichejchu qallpallaykichejmantaqa. Chaywampis Dios kikin nin chay mana creej runasqa Diosman chimpaykunqanku cheqan kausayniykichejta qhawaspa, llamp'u sonqo kasqaykichejta qhawaspa, munakuywan kausakusqaykichejta qhawaspa ima. Kaykunataj may allin kashan Diospa ñaupaqempiqa (1Pedro 3:1-4).

Ichus ajina kausayqa mana atikoj jinachu kanqa, chaywampis, sapa p'unchay cheqanta mana ch'aukiyaspa, munakuywan, mosoj runa jina kausakuy, imajtinchus Señor Jesucristo ajinata munan kausakunaykita Payta wajkuna rejsinankupaj. Diosqa mana munancho uj creyente domingo p'unchayllapi allinta kausanantaqa, manachayqa sapa p'unchay kausayninpi, llank'ayninpi ima mosoj runa jina kausakunan tiyan.

Diosman kutirikusqaykipi uj sumaj kausaqeta tarerqanki, Paytaj kashan Jesucristo. Paytaj munan Payman chimpaykunaykita willakuspa mana allin risusqanta.

Qanqa tapukushankichari ¿Chayta ruwayqa atikoj jinallachu? Nispa. Arí atikun, qan kikiyki ñawiriy imatachus Biblia nisqanta kaymanta: *“Juchasninchejtachus Diosman willakunchej chayrí, juchasninchejta pampachanqa, nisqanta junt'aj, cheqantaj kasqanrayku. Jinallataj payqa tukuy sajra kayninchejmantapis pichawasunchej”* (1Juan 1:9). Chayta ruwajtiykiqa, qanpi iskay imas kanqa:

Ñaupajpi: Sichus sapa p'unchay Payman chimpaykunki willakuspa mana allin risusqanta chayqa, Paymantaqa mana jayk'aj karunchakunkichu.

Qhepantataj: Sichus qan sapa p'unchay willakunki mana allin risusqanta, Diospa t'aqasqa kausayniykipi ñaupajllamanpuni rishanki. Arí, ajinallamanta Diospa jatun khuyakuynimpi wiñanki, imajtinchus chay tukuy imaqa Diosmanta jamun.

Uj onqosqa runaqa, pay kinqa mana jampikuyta atinchu, chay onqoyinwan, nanayninwan médico jampijllaman rinan tiyan: *“Imaraykuchus Diosqa qankunaman churan munanaykichejta, ruwanaykichejtataj paypa k'acha munayninrayku”* (Filipenses 2:13).

Ajinalla kashan cristiano kayqa, atikuj jinalla.

Chaywampis, sapa p'unchay Diosman chimpaykuy mana allin risusqanta willakuspa, mana atina jinachu, sajra aychaj munayninqa Diosmanta mana uyariyllatapis munanchu. Chaytaj kashan uj maqanaku jina kausayninchejpi. Arí sapa p'unchay chayqa kashan uj maqanaku jina chay sajra aychaj munayninwan.

Sichus ajinapi sapa p'uchay purikushanki Diosman qayllaykuspa, willakuspa mana allin risusqanta, chaypi qan kikiyki reparakunki kallpachasqa kasqaykita ima nanaytapis, ima iskayrayaytapis atipanaykipaj.

¡Aleluya, Jesusniyta tarini!,

Jatun khuyakuynimpa k'anchaynin

Kausayniypi k'ancharin.

Kunanqa rikuniña janaj pachaman apaj ñanta,

Kunanqa atini, kunanqa munani,

Chay ñanpi puriyta Paypi confiakuspa.

“Mana saqerparisqaykichu...”



